

COMMUNICAZIUN A LAS MEDIAS

Poschiavo, ils 24 d'avust 2026

Repower introducescha ina tariffa d'electricitad variabla

Repower sviluppa vinavant sia purschida da tariffas en il provediment da basa ed introducescha a partir dal 2027 la tariffa d'electricitad variabla Optima. Cun simpels signals da pretsch, dependents dal temp, stgaffescha Optima stimul finanzials da duvrar electricitad, cura che la rait electrica locala è main chargiada. Optima è ina purschida opziunala.

Cun Optima introducescha Repower a partir dal 2027 ina tariffa d'electricitad variabla per la clientella en il provediment da basa. La tariffa sa drizza a chasadas ed interpresas commercialas pli pitschnas cun in consum annual da main che 50 MWh. La premissa per la participaziun è in smart meter installà.

Trais stgalims da tariffa: verd, mellen e cotschen

Tar Optima è mintga ura dal di attribuida ad in da trais stgalims da tariffa. Ils stgalims da tariffa s'orienteschan tenor la chargia da la rait electrica e pon esser differentes tut tenor la stagiun. Verd stat per ina chargia bassa da la rait u in'alimentaziun auta d'electricitad solara ed uschia per tariffas d'electricitad favuraivlas. Mellen stat per in'utilisaziun normala da la rait. Cotschen stat per ina chargia auta da la rait e tariffas d'electricitad pli autas.

Ils stgalims da tariffas dad Optima vegnan fixads per mintga quartal sin basa da la chargia da la rait spetgada. Entaifer in quartal restan las tariffas per mintga stgalim da tariffa senza midadas e porschan a la clientella ina gronda segirezza tar la planisaziun. Ella po spustar ses consum d'electricitad planisabel, per exempel per chargiar in auto electric, per far ir ina pompa da chalur u maschinas da lavar e da lavar giu, en las uras da tariffa verdas e cun quai pli favuraivlas.

Contribuziun per distgargiar las raits electricas

La raschun per la nova structura da tariffas èn las midadas en il sistem d'electricitad pli e pli flexibel. Implants fotovoltaics, pumpas da chalur ed autos electricas han l'effect che las raits d'electricitad èn chargiadas differentamain tut tenor il temp dal di e da l'onn. Il medem mument survegn ina gestiun effizienta da la rait dapli impurtanza. La nova lescha svizra davart l'electricitad stgaffescha las cundiziuns generalas per tariffas che dattan stimul finanzials per in consum d'electricitad pli conscient ed util per la rait.

Optima metta impuls da spustar il consum d'electricitad en temps cun ina chargia pli bassa da la rait. Uschia vegn reducida la chargia maximala da la rait, nizzegiada pli effizientamain l'infrastructura da la rait existenta e sminuì il basegn d'ina extensiun chara da la rait. A media

ed a lunga vista pon uschia vegnir spargnads custs da rait en l'interess da la clientella.

Optima promova in sistem d'electricitad pli flexibel, dal qual pon profitar tant la clientella sco er ils gestiunaris da la rait. Tgi che sa decida per Optima, presta a medem temp ina contribuziun impurtanta per integrar energias regenerablas sco era per in provediment d'electricitad segir ed effizient.

Annunzia via portal da clientella Miaenergia

A partir da l'october pon las clientas ed ils clients examinar en il portal da clientella Miaenergia, schebain Optima vegn en dumonda per els, e s'annunziar directamain. La midada en la nova tariffa è voluntara e pussaivla mintgamai al cumenzament d'in quartal. Tgi che na sa decida betg per Optima, resta en la tariffa da standard.

Contact

Stefan Bisculm

manader post da medias

t +41 81 423 7700

stefan.bisculm@repower.com

Quai è Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valurisaziun da l'electricitad, da la produenziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.